



IV GOVERNO CONSTITUCIONAL
SECRETARIA DE ESTADO DO CONSELHO DE MINISTROS
õ ..
KOMUNIKADU IMPRENSA

Sorumutu Konsellu Ministrus loron 18 fulan Fevereiru tinan 2010

Konsellu Ministrus hala'o Sorumutu iha Kuarta-feira, loron 18, fulan Fevereiru tinan 2010, iha Sala Sorumutu Konsellu Ministrus nian, iha Palásiu Governu, iha Díli, no aprova tiha ona:

1.Rezolusaun ne'ebé aprova Política Kombate Má Administrasaun iha Estadu.

Política Prevensaun ba Korrupsaun, aprova tiha ona husi Konsellu Ministros ho alterasoens, atu haree liu-liu ba área ne'ebé identifikada tiha ona, hirak ne'ebé vulnerável liu no eziste tiha ona ka hirak ne'ebé mak sei halo mosu alegasaun prátika korrupsaun.

Konjuntu medidas hirak ne'e, hakarak atu reforsa instituisoens ne'ebé mak eziste tiha ona, hodi fó rekursus umanus no materiais nesessáriu efisiente no efetivu liu.

Envolvimentu Ministériu no Sekretaria Estadu, bainhira fó nia hanoin kona-ba nia respetivu planu asaun atu previne korrupsaun, sei permite ba Governu atu hola medidas preventivas kontra hahalok ne'ebé ladiak liu husi avaliasaun no revizaun anual, sei identifica kestaun hirak ne'ebé vulnerável liu kona-ba korrupsaun no possibilidade ba korrupsaun husi pontu frakeza institucional nian.

Aleinde Komissaun Funsau Públika no Komissaun Anti-Korrupsaun, Governu entende katak, Inspesaun Jerál Estadu no Unidade Inspesaun no Auditoria iha nível internu Administrasaun Públika, hanesan servisu fundamental política ida ne'e nian, ne'e duni presiza reforsu ida konsistente iha nia rekursus umanus iha termu qualidade no kuantidade, hanesan rekursus materiais nesessáriu no suficiente hodi halo inspesaun, investigasaun no auditoria.

Atu kombate hasoru korrupsaun, tenke continua hala'o nafatin no tenke iha vontade firme, laós de'it husi Governu maibé inklui mós partidu polítiku opozisaun. Tan ne'e, Política ida ne'e, sei hetan mós partisipasaun husi comunidade no opozisaun sira, liu husi kriaun forum ida boot ne'ebé órgaun representativu sira bele koñese, akompañá no fó sira nia hanoin kona-ba medidas hirak ne'ebé mak hola, rezultadu ne'ebé mak hetan no ajustamentu nesessáriu hodi bele iha liu efikásia.

2. Remunerasaun membru Komissaun Anti-Korrupsaun

Knar Konsellu Ministrus nian, hanesan órgaun soberania responsável ba organizasaun no funsionamentu Administrasaun Direta no Indereta ba Estadu, determina estatutu salariál ba membru Komissaun Anti-Korrupsaun, dekreta tiha ona katak, Komissáriu ba Komissaun Anti-Korrupsaun iha direitu ba remunerasaun ida fulan-fulan ho valor osan dólar amerikanu rihun rua atus lima, ba titulu despeza representasaun, iha aumentu ida ho valor osan dólar amerikanu rihun ida atus lima, ba Komissáriu Adjuntu iha remunerasaun fulan-fulan ho valor osan dólar amerikanu rihun rua, ho aumentu osan dólar amerikanu rihun ida atus lima ba despeza representasaun. Wainhira halo deslokasaun tanba motivu servisu, membru Komissaun Anti-Korrupsaun iha direitu subsidiu ida ba aihan no hela fatin hanesan ho membru Parlamentu Nasional ida.

Konsellu Ministrus analiza tiha ona mós:

1. Estatutu Universidade Nasional Timor Lorosa'e - UNTL

Universidade Nasional Timor Lorosa'e (UNTL) harii husi inisiativa dosente Universitas Timor Timur no Politeknik Negeri Díli, ho apoiu husi UNTAET, iha tinan 2000, husi fuzau instituisaun rua ne'e nian, atu hatan ba dezafius no ezijénsia ne'ebé mosu iha ensinu superior iha Timor-Leste, hafoin liu tiha referendum tinan 1999. Instituisaun ne'e, funsiona hela iha tinan hirak ne'e nia laran, la iha aprovasaun ba nia estatutu rasik hodi regula nia funsionamentu.

Ho forma ida ne'e, prezisa dezenvolve modelu organizasaun ida ba Universidade Públika únika iha nível nasional, ne'ebé iha kapasidade atu adapta ba inovasaun no evolusaun atu hatene no promove ás liu tan interdisiplinaridade ba koñesimentu, nune'e mós racionalizasaun ba jestaun rekursus ne'ebé eziste tiha ona.

Modelu organizasional ida ne'e, konsidera hanesan nesessidade atu reforsa artikulasaun política estratéjika Universidade nian no dezenvolvimentu ekonómiku-sosial sustentável ba Nasaun, hodi adopta desentralizasaun ba nia Unidade Orgánika husi rejiaun oin-oin, liu husi jestaun ne'ebé halo parte iha ensinu no investigasaun relasionadu ba karakterístika no potencialidade ekonómika, sosial no kultural rejiaun idak-idak nian.

2. Lisensiamentu Ambientál

Harii sistema lisensiamentu ambientál ne'ebé bele permite atu previne impaktu negativu iha meu ambiente hanesan política ambientál diak liu ba Nasaun.

Lisensiamentu ambientál fó garantia iha karákteer preventivu ba prezervasaun meu ambiente ida ne'ebé ekolojikamente ekilibradu no sustentadu, bele hatan ba nesessidade prevensaun impaktu ambientál ba funsaun kompleksidade pr ojetu nian no bele atende ba realidade ekonómika no sosial ba Timor-Leste.

Atribuisaun ba lisensa ambientál no nia fiskalizaun, tenke dependente ba prosedimentu avalisasaun ambientál pr ojetu nian, ho forma ida ne'e hakarak hala'o prosedimentu ida integradu no prosessu ida simplifikadu ba prevensaun impaktu ambien tál no kontrolu poluisaun ba pr ojetu.